



List Saveza lovačkih društava Tuzlanskog kantona

Lovaac

Broj 104

Tuzla, decembar/prosinac 2024.

Cijena 1,00 KM

Sretna Nova 2025



Lovac

List Saveza lovačkih društava
Tuzlanskog kantona

Izlazi tromjesečno

Izdavač:

Upravni odbor Saveza lovačkih društava
Tuzlanskog kantona

Za izdavača:

Seid Čorbić, dipl. ing. šum.
predsjednik UO SLD TK

Redakcija lista "Lovac":

Jusuf Selmanović (Kalesija)
Dževad Korman (Tuzla)
Damir Abdulahović (Banovići)
Nusret Kamenjaković (Živinice)
Elvir Garibović (Sapna)
Edin Taletović (Srebrenik)
Meho Pezerović (Gradačac)
Hajrudin Imširović (Teočak)
Senad Selimbašić (Kladanj)
Džemal Jukan (Gračanica)
Enes Sejdinović (Lukavac)
Kemal Bratić (Doboj-Istok)
Hasan Slomić (Čelčić)

Glavni i odgovorni urednik:
Seid Čorbić, dipl. ing. šum.

Urednik i lektor:
Prof. Mirzet Ibrišimović

Stručni saradnik:
Selver Pirić

Fotoliti:
B Concept Sarajevo

Priprema i štampa:
"Mikroštampa" Tuzla

Za štampariju:
Šaban Cipurković

Adresa redakcije "Lovac"
Tuzla, Džindić mahala 13.
Tel./fax: 035/258-004
Web site: www.lovac.tk
E-mail: info@lovactk.com

Račun kod Tuzlanske banke d.d. Tuzla
132-100-03092192-27

Na osnovu mišljenja Ministarstva
za obrazovanje, nauku, kulturu, sport
i informisanje Vlade TK broj
10/1-452-25-2/98 od 28. 08. 1998. god.,
list „Lovac“ oslobođen je dijela
poreza na promet

Lov kao fenomen

Lov je biološki i kulturno najznačajnija formativna sila u razvoju čovjeka. Lov je djelatnost kojoj se čovjek kroz cijelu svoju historiju najpredanije prepusta. Dva miliona godina stara baština lovačko-sakupljačkog života, rubna s početka, ali naposljetku izvrsno profinjena, ostavila je svoj trag na našem umu onoliko koliko i na našem tijelu, ali pored tehničkih vještina planiranja, povezivanja i tehnologije, jednako je važna bila i društvena vještina saradnje. Kao svijest o zajedničkim ciljevima i vrijednostima, želji za unapređenjem zajedničkog dobra, saradnja je bila više od toga da pojedinci rade zajedno. Tako je ta baština postala skup pravila ponašanja, morala, razumijevanja ispravnog i pogrešnog u složenom društvenom sistemu. Bez saradnje unutar družina naše tehničke vještine bile bi tupe. Tragom svega toga, u okviru lova i svih bioloških i društvenih konsekvenci koje je lov unio u ljudski život, u tom vremenu su se pojavila društvena pravila i standardi ponašanja, otvarajući tako vrata kulturnom i duhovnom razvoju čovjeka. Kao ljudsku djelatnost, lov je uticao na razvoj čovjeka na planu koji bi mogao biti predmet istraživanja mnogih znanstvenih disciplina. Danas, u kontekstu globalnih promjena u odnosu čovjeka prema okolišu i dimenzioniranja ljudskog društva na sasvim različitim temeljima od onih u prošlosti, lov se često gleda kao recidiv ili teret prošlosti kojeg se treba riješiti. Ali, ne može se zaobići činjenicu da je čovjek u 99% vremena svog postojanja bio lovac, a tek u 1% poljoprivrednik ili djelatnik u nekom od drugih gospodarskih modela koji su se pojavljivali kroz historiju sve do danas. To navodi na zaključak kako lov treba posmatrati kao široku mogućnost načina života i široki spektar aktivnosti kroz zakonski obavezujuće aktivnosti zaštite, dohrane, uzgajanja i oplemenjivanja određene vrste i kroz selekciju i uzgojni odstrjel nerazvijenih i bolesnih jedinki (svojevrsna intervencija, odnosno ublažavanje uticaja promjena koje su dovele do narušavanja biološke raznovrsnosti), kao i kroz visoku ekološku svijest i iskustva lovaca kada nastaju nove ideje o mogućnostima podizanja svijesti ljudi o potrebama i dobiti životinja kao osjećajnih bića i promoviranja odgovornog odnosa prema njima. Psihobiološke korijene tog života unosimo u podmladak putem igre i putem uloga identifikacije sa odraslima. Lov je stoga više od ekonomskog sistema jer određuje čovjekov razvoj, kako na tjelesnom (anatomskom i fiziološkom) tako i na društvenom i duhovnom planu. Čovjek, za razliku od drugih bića, stvara svoj svijet u kojem često fizičke i prirodne dimenzije uzmiču pred nekim simboličkim oblicima postojanja. Govoreći o fenomenu lova treba znati da lov neće samo preobraziti odnos prema okolini, već i odnos čovjeka prema čovjeku, muškarca prema ženi, odraslih prema mladima. Štaviše: njegov vlastiti razvoj, u sprezi s preobrazbama koje su na djelu, preobrazit će pojedinca, društvo, vrstu. Pojam antropološkog transformizma naglašava radikalnu razliku između čovjekolikog stadija prije usvajanja lova kao osnovnog hranidbenog alata i poslije tog procesa. Lov će izvještiti hominida i učiniti ga posebnim: učinit će od njega tumača golemog broja sličnih i ambivalentnih osjetnih stimula koji će postati signali, indicije, poruke, a njihov će prepoznavatelj postati znalac. On inteligenciju sukobljava s onim što je u prirodi najprepednije, navodeći ga na susret i nadmetanje s onim što je najopasnije: velikim mesožderom. Lov stimulira strateške sposobnosti: pozornost, ustrajnost, borbenost, odvažnost, lukavstvo, obmanjivanje, postavljanje mamaca, stupica i zasjeda. Dakle, očita je važnost uticaja lova na duhovni i fizički razvoj čovjeka i očit je razlog za posmatranje lova kao fenomena u kulturnom i antropološkom kontekstu. Danas je lov i prigodan sport. Loveći čovjek bježi iskonu, bježi od sive svakodnevice, bježi od života koji je dimenzioniran kulturnim i socijalnim odrednicama, na način da je duhovno otuđen a prostorno i sadržajno vrlo udaljen od prirode. Lov je dakle bijeg od takvog učmalog života, odnosno korektor življenja nezdravih navika.

M.I.



Dani SLD TK 2024

Sedmog septembra 2024., na stadionu „Popovača“ Gradačac, održana je tradicionalna manifestacija Dani Saveza lovačkih društava Tuzlanskog kantona 2024. Domaćin LD „Jelen“ Gradačac, uspješno je organizovao manifestaciju, na kojoj je učestvovalo oko 2.000 lovaca s područja TK i gostiju. Manifestacija je otvorena svečanim defileom članica Saveza i intoniranjem himne BiH. U ime organizatora prisutnima se obratio Meho Pezerović, predsjednik LD „Jelen“ Gradačac, u ime Saveza Seid Čorbić, predsjednik SLD

TK i u ime Vlade TK Fedahija Ahmetović, ministar Ministarstva za poljoprivredu, šumarstvo i vodoprivredu TK, koji je ujedno i otvorio manifestaciju. Vlada TK je bila i generalni pokrovitelj ove manifestacije koja je na spisku manifestacija od interesa za Tuzlanski kanton. U sklopu manifestacije, nakon službenog svečanog otvaranja, a prije zvaničnog početka druženja, održana su tradicionalna takmičenja u streljaštvu-gađanju glinenih golubova, povlačenju konopca, spravljanju lovačkog gulaša (kotličijada) i revija lovnih pasa.



Streljaštvo

Poredak ekipno:

I LD „Srndać“ Gračanica

II LD „Svatovac“ Lukavac

III LD „Tuzla“ Tuzla

Nagrada za fair play, LD „Sokolina“ Kladanj



Poredak pojedinačno:

I Zekić Ramo LD „Svatovac“ Lukavac

II Kovačević Toni LD „Tuzla“ Tuzla

III Osmić Elmir LD „Srndać“ Gračanica

IV Muratović Hakija LD „Vjetrenik-Šibošnica“ Čelić

V Jašarević Armin LD „Srndać“ Gračanica

VI Tabaković Alen LD „Svatovac“ Lukavac

Revija lovnih pasa

I Irski seter (mužjak), vl. Krajinović Almina, LD „Jelen“ Gradačac

II Istarski kratkodlaki gonič (ženka), vl. Huskić Refik, LD „Srndać“ Gračanica

III Posavski gonič (ženka), vl. Malkočević Sanel, LD „Tuzla“ Tuzla



Kotličijada

I LD „Svatovac“ Lukavac

II LD „Toplica“ Živinice

III LD „Zelemboj“ Banovići



Potezanje konopca

I LD „Jelen“ Gradačac

II LD „Teočak“ Teočak

III LD „Sokolina“ Kladanj



Nakon svih takmičenja dodjeljeni su pehari i medalje najuspješnijim ekipama i pojedincima, nakon čega su svi uživali u druženju, u ručku kojeg je pripremila Mesna industrija „Menprom“ Gornja Tuzla.







Selver Pirić
Sekretar SLD TK

Savez lovačkih društava Tuzlanskog kantona Ugovori o korištenju sredstava iz Fonda općekorisnih funkcija šuma

Sredinom septembra, u organizaciji Ministarstva za poljoprivredu, šumarstvo i vodoprivredu TK, odnosno Fedahije Ahmetovića, ministra resornog Ministarstva, u prostorijama Ministarstva, upriličeno je potpisivanje ugovora o korištenju sredstava iz Fonda općekorisnih funkcija šuma, a tiču se realizacije projekata za razvoj i unaprijeđenje lovstva. Bila je to prilika da direktor Kantonalne uprave za šumarstvo, Kadrija Omazić, istovremeno potpiše ugovore sa predstavnicima svih članica SLD TK. Treba istaći da je ove godine odobren rekordan iznos sredstava od 350.000 KM, a koji je ravnopravno raspoređen na

sve članice Saveza. To sve potvrđuje izuzetno dobru saradnju resornog Ministarstva za poljoprivredu, šumarstvo i vodoprivredu TK sa Savezom LD TK, koji je i ove godine bio nosilac pomenutih aktivnosti. Nakon potpisivanja ugovora slijedi obaveza članica SLD TK na realizaciji vrlo bitnih projekata na unaprijeđenju lovstva, a nakon toga i pravdanje namjenski utrošenih sredstava. Ovaj način finansiranja je četvrti u nizu i pokazao se veoma efikasan u poboljšanju stanja u lovištu.

Selver Pirić
Sekretar SLD TK



Kinološke aktivnosti SLD TK

Realizirajući Plan rada Savjeta za lovnu kinologiju, održano je 13 redovno-uzgojno-ocjenivačkih smotri lovnih pasa; dvije revijalne smotre pasa - jedna u Tuzli u sklopu Manifestacije Lovčki susreti Stara Majevisa i druga u Građacu na manifestaciji Dani SLD TK; tri ispita urođenih osobina pasa u radu na divlju svinju, dva u Tuzli i jedan u Gračanici. Ovogodišnje ocjenjivačke kinološke smotre su se održale u svim lovačkim društvima SLD TK. Ocijenjeno je oko 400 pasa





uz intenzivan progres kvalitete eksterijera pasa. Svi psi su klasični primjerci svoje rase. Sistematičan, kvalitetan način rada je iskorijenio višegodišnju praksu ukrštanja pasa različitih rasa. Posebnu zaslugu u tom imaju vođe uzgoja, asistenti vođa uzgoja i kinološke sudije koji učestvuju u smotrama. Ovakav način rada je regulisan Ugovorom o članstvu između Bosanskog kinološkog saveza i Saveza lovačkih društava Tuzlanskog kantona, na osnovu kojeg su članovi SLD TK i članovi BKS.



Selver Pirić
Sekretar SLD TK

Kantonalna liga u streljaštvu

U organizaciji Saveza LD TK, krajem avgusta i početkom septembra, održana je Kantonalna liga u gađanju glinenih golubova – trap disciplina. Održala se u tri kola na tri lokaliteta, na strelištu kluba Target u Gračanici, strelištu Prokop u Srebreniku i finale na strelištu kluba Lovac u Tuzli na kopu Šićki Brod. Natjecalo se gađanjem 150 letećih meta i dodatnih 35 meta za prvoplasiranih šest strijelaca.



Postignuti su sljedeći ekipni i pojedinačni rezultati:

Ekipno:

1. LD „Tuzla I“ Tuzla 384 pogodaka
2. LD „Vjetrenik-Šibošnica“ Čelić 334 pogodaka
3. LD „Tuzla II“ Tuzla 329 pogodaka

Pojedinačno:

1. Kaldrmdžić Antonio
2. Kaldrmdžić Jozo
3. Muratović Hakija
4. Meh Zoran
5. Kovačević Toni
6. Zahirović Emir


Selver Pirić
Sekretar SLD TK

Lovačko društvo „Tuzla“ Tuzla

Tadin srndać uz sinove

Počasn, vrijedni i časn lovac Mirsad Jusufović zv. Tado, član Sekcije „Simin Han“, lošijeg je zdravlja ali ga nije napustila volja za lovom i lovačkim druženjem. Tako je nedavno u svom prvom izlasku u lov na srndaća odstrijelio kvalitetan primjerak, vrijedan trofej. I njegova dva sina su lovci, članovi iste Sekcije, Enijad i Edžmijad, koji su i u ovom lovu bili uz oca.

M.I.



Lovačko društvo „Jelen“ Gradačac

Ulov vepra kapitalca

Lovačka sekcija „Međida Gornja“ ovu lovnu sezonu je započela uspješnim lovom crne divljači, odstrjelom kapitalnog vepra od 261 kg. Vješt strijelac je bio sekcijiski lovnik Mirel Habibović. Grupa složnih i strastvenih lovaca je ovaj uzbudljiv lov obavila početkom novembra u dijelu lovišta Avrići na granici sa Skipovcem. Ulov vepra grdosije su proslavili druženjem u lovačkoj kući Avrići.

Bajro Subašić





Lovačko društvo „Sokolina“ Kladanj

Fuadov het-trick

Maglovito oktobarsko jutro na obroncima Konjuha lovcima sekcija „Tuholj“ i „Tarevo“ nije uspjelo da pokvari lov na crnu divljač. Na zbornom mjestu kod ljetnjikovca na Plazuljama, grupovođe obje sekcije su dogovorili da se lovi na prostoru Nuhinog dola i Ježevika. Uz ozbiljnost svih učesnika, lovci su raspoređeni na čeke iz dva pravca, kako bi plato Ježevika bio adekvatno pokriven, dok je hajka bila zadužena za kretanje od Prosjeka, preko Božika prema Ježeviku. Psi su pušteni i Konjuhom je odjeknuo glas hajkača pomiješan sa lavežom pasa. Odjeknuo je više pucnjeva sa lokaliteta gdje je bio mladi ali već iskusni lovac Fuad Vejzović. Povikao je da je odstrijelio tri divlje svinje. Učinio je to uz pomoć i pred posavcima Dine Šarića. Nakon transporta lovine i zajedničkog fotografisanja, uslijedilo je veselo druženje svih učesnika lova.

Elvir Šarić



Lovačko društvo „Sokolina“ Kladanj Zajednički lov sekcija „Tuholj“ i „Tarevo“

Početkom novembra lovci sekcija „Tuholj“ i „Tarevo“ su upriličili zajednički lov na crnu divljač i štetočine na lokalitetu Ježevik, Božike i Obrtanja. Nakon što su predsjednici obje sekcije, na zbornom mjestu kod ljetnjikovca na Plazuljama, pozdravili lovce, riječ su preuzeli grupovođe i skrenuli pažnju lovcima na ozbiljnost u ponašanju tokom lova. Postavljena je zasjeda, hajka kreće s vrha Nuhinog dola. Glasovi hajkača odjekuju dolinom Konjuha. Vjerni pomagači, posavci Dine Šarića, ispod krša na Ježeviku, oblajavaju u mjestu i pokreću divljač direktno na čeke. Začula su se dva pucnja i svi su pomislili da je lov završen, ali to su bili pucnji upozorenja iz pištolja kojima je Suad Šarić zaustavio medvjeda koji je otišao u drugom pravcu. Ermin Vejzović je odstrijelio lisicu, a nakon lova druženje je nastavljeno kod ljetnjikovca Plazulje, uz smijeh i pjesmu, a sve je svojim prisustvom uvećao Senad Selimbašić, predsjednik LD „Sokolina“ Kladanj.

Elvir Šarić



Lovačko društvo „Toplica“ Živinice

Tri divlje svinje u lovištu Kotornica

Početkom novembra, lovci Sekcije „Đurđevik“-Grupa „Kotornica“, u lovištu Kotornica, imali su uspješan lovni dan na crnu divljač. Vepra je odstrijelio Amir Muminović, krmaču Almir Pašić i nezime Mujo Malkić.

Huska Konjević

Lovačko društvo „Toplica“ Živinice Otac i sin vrsni lovci

Emir Muminović počesni član LD „Toplica“ Živinice-Sekcija „Đurdevik“ svoje iskustvo i vještinu lova je uspješno prenio na sina Amira, a to se pokazalo i tokom posljednjih aktivnosti Društva, odnosno lova na crnu divljač kada je Amir odstrijelio vepa.

Huska Konjević



Lovačko društvo „Toplica“ Živinice Vepar za Emira

Krajem septembra lovci Sekcije „Svojat-Bašigovci“ imali su uspješan lovni dan na crnu divljač. Na lokalitetu Lipići-Džebari vepa je odstrijelio Emir Kamenjaković.

Huska Konjević



Lovačko društvo „Toplica“ Živinice Vepar za Damira

Krajem septembra lovci Sekcije „Svojat-Bašigovci“ imali su uspješan lovni dan na crnu divljač. Nakon odlično organizovane i realizovane hajke, na lokalitetu Krivača, vepa je odstrijelio Damir Džankić.

Huska Konjević



Lovačko društvo „Toplica“ Živinice Omerov odmor

Sredinom oktobra, na dan otvorenja lova na nisku divljač, lovci Sekcije „Dubrave“, Grupa „Dubrave“, upriličili su druženje u lovnom objektu nadstrešnica „Omerov odmor“ u rejonu Dolina. Nadstrešnica je dobila ime po rahmetli počasnom članu Bošnjaković Omeru, a ovo memorijalno druženje je posebnu draž imalo u tome što su ga uveličali počasni članovi Sekcije, Bulić Sakib i Bošnjaković Ibro. Druženje je trajalo do mraka, uz dobro jelo, piće i priče iz lova.

Huska Konjević

Lovačko društvo „Toplica“ Živinice Pošumljavanje ugroženih šumskih površina

Sredinom novembra, članovi „LD Toplica“ Živinice, na više šumskih lokacija ugroženih i devastiranih požarima i nekontrolisanom sječom drveća, na području općina Kalesija i Banovići te grada Živinice, izvršili zasađivanje oko 12.000 sadnica crnog bora, javora i hrasta.

Huska Konjević



Lovačko društvo „Majevica“ Srebrenik Predsjednik dva vepa

Krajem septembra, lovci Sekcije „Tinja“, imali su uspješan lovni dan na crnu divljač. Na lokalitetu Crijetež su ulovili dva vepa, a sretan strijelac je bio Edin Taletović, predsjednik LD „Majevica“ Srebrenik. Pored njega u lovu su učestvovali Kadir Mešaljić, Begzudin Mešić, Izudin Mahmutović, Husnija Mešaljić, Mirnes Musić, Amir Fejzić i Muamer Muminović.

Edin Taletović



Lovačko društvo „Srndač“ Gračanica Belminova dva srndača

U dva organizovana lova na šumskog princa, mladi lovac Belmin Sejdinović, početkom i krajem juna, odstrijelio je dva lijepa primjerka srndača. Prvog je odstrijelio na lokalitetu Kovačević, a drugog na lokalitetu Mehmedović, u lovištu Sekcije „Džakule“, čiji je Belmin član.

Fikret Ahmetbašić

Lovačko društvo „Srndač“ Gračanica Najtrofejniji lovac na predatore

Narmin Avdić, član LS „Stjepan Polje“, do sada je najtrofejniji lovac na predatore. Nedavno je u samo jednom lovnom danu odstrijelio dva šakala, dvije lisice i četiri psa lotalice koji su se nekontrolisano kretali lovištem. Nermin je inače član UO Društva, a zbog svoje duhovitosti i nesebičnog zalaganju na unapređenju lovstva i zaštiti plemenite divljači, veoma je omiljen i cijenjen među kolegama. Sreću da odstrijeli šakala je imao i Zlatan Mujkić, lovac LS „Gračanica II“. Upravni odbor Društva je donio Odluku o subvencioniranju svojih članova za odstrjel predatora kao što su: lisica, kuna i šakal, a u cilju zaštite divljači i održavanja ekološke ravnoteže u lovištu, na način što će se



svakom lovcu umanjiti obaveza plaćanja punog iznosa članarine, i to: za iznos od 10 KM za odstrjel lisice, za 20 KM za odstrjel kune i 100 KM za odstrjel šakala. Predviđeno je i subvencioniranje odstrjela divljih svinja i pasa lotalica, a u vidu obeštećenja lovca za municiju koju je utrošio kroz ove aktivnosti.

Enes Ahmetbašić



Lovačko društvo „Srndać“ Gračanica

Pomoć Jablanici

U poplavljena područja BiH stigla je pomoć od lovaca LD „Srndać“ Gračanica. Džemal Jukan, predsjednik Društva, kaže da su svi lovci izuzetno solidarni kada nekome treba pružiti pomoć, a Enes Ahmetbašić, sekretar Društva, ističe: „Mi smo putem naših lovačkih sekcija, shvativši u kako teškom položaju se nalaze porodice naših kolega lovaca koje su ostale bez svojih članova, prikupili 8.516,00 KM i iz sredstava budžeta izdvojili još 1.000 KM. Posebno emotivno je bilo u porodici jablaničkog heroja, našeg kolege lovca Ernada Begovića, koji je spašavajući 10 svojih mještana i sam stradao. Njegovom sinu Edinu smo uručili pomoć, a otprilike polovinu novčanih sredstava smo uručili i porodici Tufek, koja je cijela nastradala u nabujalim vodama, a pomoć će biti uručena unuku našeg kolege lovca, Ediju Tufek, koji se od zadobijenih povreda i dalje nalazi u bolnici na liječenju“.

Enes Ahmetbašić



Lovačko društvo „Srndać“ Gračanica

Humana akcija Sekcije „Gračanica 2“

Lovci veoma aktivne Sekcije „Gračanica 2“ zimi divljač prihranjuju kukuruzom kojeg su sami zasijali na parcelama u vlasništvu lovaca, a ljeti s traktorima dovoze cisterne s vodom u pojilišta Gajevi, Bajkovac, Brezici i Zečev Gaj. To je izuzetno humana i neophodna akcija jer je divljač ugrožena u dugom sušnom periodu. Mirza Ibraković, predsjednik Sekcije kaže da divljač ljeti, kad presuše potoci i izvori, kreće prema Spreči, a tad je ugrožena jer mora preći veoma frekventan magistralni put Tuzla-Doboj. Da divljač ne bi kretala na taj opasan put osmislili su i realizovali akciju punjenja 32 pojilišta koja su sami izgradili.

Enes Ahmetbašić



Lovačko društvo „Srndać“ Gračanica

Lov za počasne lovce

Kao i svake godine i ove lovne 2024./25., a u sklopu Plana rada LD „Srndać“ Gračanica, UO Društva, početkom oktobra, u dijelu lovišta kojim gazduju sekcije „Gračanica I“ i „Vranovići“, organizovao je i sproveo lov na nisku divljač za počasne lovce Društva. Okupljanje je bilo u rejonu lovačke kuće Pijeskovi, gdje se prisutnima kratko obratio Džemal Jukan, predsjednik kao i Suljo Kahvedžić, glavni lovovoga Društva i Hasan Karić, lovovođa u LS „Vranovići“, zaželivši im dobrodošlicu, uspješan i bezbjedan lov.

Muđu najuspješnijim u lovu je bio Ibrahim Džikić, predsjednik i počasni lovac LS „Gračanica I“, odstrijelivši zeca. Nakon lova je druženje nastavljeno uz zajednički ručak, a u znak solidarnosti sa porodicama stradalih lovaca u Jablanici, izostao je muzički program, koje je inače bio obavezan na ovakvim i sličnim manifestacijama Društva.

Enes Ahmetbašić



Lovačko društvo „Srndać“ Gračanica


Značajni rezultati na obilježavanju Dana SLD TK

U obilježavanju manifestacije Dani SLD TK, koja se ove godine održala u Gradačcu, aktivno učešće je uzelo i LD „Srndać“ Gračanica kroz sve revijalne i takmičarske discipline. Na izložbi pasa Društvo je imalo tri psa predstavnika: Bosanski oštrodlaki gonič Barak u vlasništvu Armina Mujčića, inače psa s poveljom šampiona BiH, Slovačkog kopa u vlasništvu Sejada Ćirića i ženku Istarskog kratkodlakog goniča u vlasništvu Refika Huskića iz Prijekog Brda, koja je po ocjeni sudija zauzela drugo mjesto. Streljačka ekipa Društva u takmičarskom dijelu gađanja glinenih golubova, a koju su sačinjavali: Armin Jašarević, Ibrahim Džikić i Elmir Osmić, zauzela je prvo mjesto,



dok je Elmir Osmić osvojio treće mjesto u pojedinačnoj konkurenciji.

Enes Ahmetbašić





Neke aktivnosti Lovačkog društva „Spreča“ Kalesija

Piše:
Damir Huremović

Sekcija „Rainci“ - Grupa „Lipovice“

Lovačka grupa „Lipovice“ jedna je od najbrojnijih grupa u sklopu Sekcije „Rainci“.



Ima 24 člana, od toga dva počasna i dva pomažuća, od kojih je najmlađi osmogodišnji Jakub Hasanović. Grupa gazduje brdsko-planinskim lovištem koje je bogato crnom i srnećom divljači. Na južnim padinama Majevice su, 1982. godine, izgradili lovačku kuću u sklopu LS „Rainci“. Posjeduje tri visoke čeke, tri automatske hranilice te više desetina solila. U narednom periodu planiraju izgraditi još dvije visoke čeke kao i hranilicu za srneću divljač, istakao je grupovođa Hajrudin Maljišević. Član Grupe je i Elvis Zulić, koji je ujedno i predsjednik Interne kontrole u LS „Rainci“. Članovi Grupe su izuzetno aktivni u zaštiti divljači.

Na mladima lovstvo ostaje

Mladi kalesijski lovac Mirnes Zahirović, član Sekcije „Rainci“ od 2020. godine, iako mlad lovac pokazao je izuzetno umijeće u lovu srneće divljaci. U prethodne dvije lovne sezone odstrijelio je dva prelijepa srndaća. Mirnes je aktivan u akcijama Sekcije iako se nalazi na privremenom radu u Švajcarskoj jer godišnje odmora koristi da što više vremena provede u prirodi sa kolegama lovcima i pridonese



lovstvu. Ljubav je prenio i na desetogodišnjeg sina Anisa, sa kojim iznosi hranu neophodnu za opstanak divljači.

Sekcija „Spreča“

Sredinom oktobra, kad je otvorena lovna sezona, lovci dvije grupe „Jelovo brdo“ i „Gojčina“, koji čine Sekciju „Spreča“, organizovali su zajednicki



lov na Jelobrdskom lugu. Lovačka sreća je bila naklonjena Sakibu Bećiroviću, lovovodi Grupe „Jelovo brdo“ koji je odstrijelio veptra i Midhatu Hrvicu, koji je odstrijelio još jednog veptra. Po završetku lova nastavljeno je druženje lovaca uz ručak i prepričavanje minulog lova uz odstrjel dva veptra.

Sekcija „Kalesija“

Na lokalitetu Labarica, na jugoistočnim padinama Majevice, organizovan je zajednicki lov lovaca iz Jajića i Prnjavora. Ulogu domaćina i organozatora lova je preuzeo Mirel Selmanović iz Jajića. Na istoimenom lokalitetu, uz pomoć pasa goniča, koje je poveo Elvis Softić iz Prnjavora, Mirel je odstrijelio veptra. Inače, Mirel ima posavske goniče i na njih je



posebno ponosan. Naklonost prema njima je prenio na šestogodišnju kćerku Aminu, koja već sad pokazuje ljubav prema lovu i svom Posavcu kojem je dala ime Sila. Kad se steknu uslovi Mirel planira Aminu učlaniti kao pomazućeg člana Društva.



Poklon se vratio u Kalesiju

U organizaciji SLD TK u Gradačcu je 7. septembra održano tradicionalno druženje lovaca, manifestacija Dani SLD TK, na kojoj su učestvovali i lovci iz LD „Spreča“ Kalesija.



Osim svečanog defilea i takmičenja, održana je i tombola s vrijednim nagradama. Jednu od nagrada, pušku sačmaricu, donirao je Jusuf Selmanović, predsjednik Društva, a interesantno je da je istu pušku osvojio Bajro Bajrić lovac iz Kalesije. Glavna nagrada, lovački karabin ATA ARMS, završila je kod Mevludina Čamdžića, također lovca iz Kalesije.

Ocjena lovačkih trofeja

Početkom oktobra, u prostorijama Lovačkog doma u Kalesiji, izvršena je ocjena lovačkih trofeja srneće divljači. Od ukupnog broja trofeja (24 odstrijeljena srndaća), dva trofeja su u bronzanoj medalji. Komisija, u sastavu Enver Kurtić, Jusuf Selmanović i Mujo Čamdžić, zadovoljna je trofejima i istakla je da se još više mora raditi na uzgoju, prihrani i zaštiti srneće divljači kao plemenite lovne vrste.





Mjere zaštite i uzgoja divljači zimi

Planiranje gospodarskih mjera u lovištu (zaštita i uzgoj divljači, uređenje lovišta, korištenje lovišta i divljači, mjere za smanjenje šteta od divljači...) obveza je predviđena Zakonom o lovstvu i podzakonskim aktima. Njihov oblik i opseg se utvrđuje u lovno-gospodarskim osnovama, a potanko se razrađuju u redovnim godišnjim planovima gospodarenja gdje se te mjere definiraju u skladu s podacima o proljetnom stanju pojedinih vrsta divljači i predviđenim promjenama koje donosi godišnja dinamika razvoja (prirast priplodom i prelazak u više dobne razrede) kod pojedinih populacija. Normalno je da se u godišnjim planovima (uz oblik i opseg pojedinih mjera) utvrde i rokovi njihova izvršenja, kako bi poduzete mjere dale očekivane učinke. Ovo vrijedi i kad su u pitanju mjere zaštite i uzgoja divljači. Zadaci utvrđeni godišnjim planom uključuju i zimsko razdoblje.

Mjerama zaštite lovišta i divljači zimi pripada prvo mjesto. O uspješnosti poduzetih mjera zaštite ovise rezultati ostalih gospodarskih mjera. Ovim se mjerama štiti mir



u lovištu, koji mogu narušiti krivolovci ili prekobrojni predatori, prati se zdravstveno stanje i razvojni proces svih populacija divljači, nadzire se stanje infrastrukturnih objekata i prate se posljedice nastale prirodnim pojavama. Prvo, organizirana lovočuvarska služba treba zaštititi populacije divljači u lovištu kako bi divljač, svaka posebno i u punom broju, kroz tekuće reproduktivne i razvojne procese postigla optimalne, planom predviđene rezultate. Zadaci stručne i lovočuvarske službe u zimskom su razdoblju jednaki kao i u ostalim godišnjim dobima. Naglašenija se pozornost poklanja događanjima u lovištu u razdobljima s debljim snježnim pokrivačem, kad je divljači otežano kretanje pa je povećana opasnost od predatora i krivolovaca, koji mogu ozbiljno poremetiti planirane razvojne procese kod divljači i zacrtane gospodarske ciljeve.



Drugo, savjesno praćenje zdravstvenog stanja i razvojnog procesa populacija divljači i izvještaji u uočenom, stalan je zadatak lovočuvarske službe i svih aktera u lovištu, a posebno pred sezonu i tokom korištenja lovišta i divljači. Na temelju podataka terenskog osoblja, stručna služba lovišta načinit će konkretan prijedlog korištenja divljači, u kojem će, kod krupne divljači, predvidjeti da se iz lovišta najprije izluče ozlijeđene, na bolest sumnjive i uzgojno nepoželjne jedinke, a tek potom i trofejno dozrele, a kod sitne da se iskoristi realan godišnji prirast, kako bi se u sljedeću reproduktivnu sezonu ušlo s poželjnom i (lovno-gospodarskom osnovom) planiranom spolnom i starosnom strukturom populacija. Treće, očuvanje svih infrastrukturnih objekata lovišta u funkcionalnom stanju. Uloga je infrastrukturnih objekata predviđenih osnovom da doprinesu lakšem postizanju očekivanih rezultata u gospodarenju lovištem. Objekti trebaju biti uporabljivi tokom cijele godine. U zimskim mjesecima, sa stanovišta zaštite, pažnju posvećujemo zatvorenim čekama (uz hranilišta) iz kojih se, u noćima s mjesecinom, prati stanje kod krupne divljači i predatora, i na temelju tih podataka odlučuje se o odabiru jedinki za izlučivanje. Istovremeno se ustanovljava brojnost s kojom se, u idućoj reproduktivnoj sezoni, može računati kod onih vrsta koje u razdoblju proljetnog prebrojavanja (zbog dužeg trajanja zimskih uvjeta) mogu biti nedostupne. S ciljem zaštite, pažnja se poklanja i očuvanju oznaka granica lovišta, brine se o prohodnosti staza za komunikaciju do hranilišta (kako bi ona bila dostupna divljači i radnicima koji se o njima staraju), čeka, koliba i drugih lovno-tehničkih objekata. Odgovarajuća briga se poklanja i funkcionalnosti lovno-uzgojnih objekata, posebno onih koji služe čuvanju i ponudi hrane (stogovi, sjenici, koševi, hambari, trapovi, silaže i hranilišta). Četvrto, u mjere zaštite treba uvrstiti i kontrolu da se divljač ne uznemirava i lovi u vrijeme kad je na prostoru na kojem je ugrožena poplavom, snijegom, požarom, poledicom i prirodnim nesrećama.

U **mjerama uzgoja** divljači zimi najprije se ubrajaju one kojima se, u kritičnim razdobljima, osigurava prihranjivanje kabastom, zrnastom, gomoljastom ili zelenom hranom. Bitno je naglasiti da se one mogu ostvariti samo ako je hrana (u opsegu predviđenom godišnjim planom) na vrijeme i uredno uskladištena i pripremljena za ponudu divljači u odgovarajućim hranilištima (koja se obvezno aktiviraju u razdoblju bez snijega, radi privikavanja divljači na njih) i ako se ona u krizno vrijeme uredno dopunjuju. U praksi se sve to obično prakticira na sljedeće načine:

Prvo, kabastu hranu iz stogova raspoređenih po lovištu činimo dostupnom pred očekivani snijeg, i to skidanjem ograde koja ih je štitila u razdoblju ispaše domaćeg blaga, a iz sjenika – spuštanjem dnevnih količina sijena u jasje (pod sjenikom) u dane kad to smatramo potrebnim, kako bi je divljač koristila. Drugo, zrnastu hranu preživačima nudimo u koritancima ispod jaslala u sjeniku, medvjedima iz betonskih (automatskih) hranilica, divljim svinjama (i medvjedima) iz hranilica od traktorskih guma ili metalnih hranilica, a poljskim kokama ispod nadstrešnica. Treće, gomoljastu i zelenu hranu: krompir, repu, čičoku i stočni kelj, divljači nudimo na njivama za divljač u lovištu (koju sama pronalazi), a samo gomoljastu još i iz trapova pokraj hranilišta. Ne smijemo, pritom, nikako zaboraviti vodu, koja je nužna za opstanak divljači. Krizna razdoblja mogu prouzročiti dugotrajne suše ili duža vremenska razdoblja s ekstremno niskim temperaturama. U takvim okolnostima vodeni tokovi i izvori presahnu ili se zamrznu, i za životne potrebe divljači voda postaje dostupna samo iz nesusušenih vlati trave, neodrvjenjelih izbojaka drveća i grmlja, opalih plodova šumskog voća (nezamrznutog – pod listincem), te gomolja (krompira, čičoke ili repe) i stočnog kelja, koje divljač sama pronalaze u njivama za divljač ili su joj ponuđeni iz trapova. Četvrto, ako se nudi hrana iz trapova, valja je ponuditi u doba dana kad su temperature najviše i u količini koju će divljač pojesti prije večernjeg mraza Neiskorišteni ostatci – smrznuti gomolji, neuporabljivi su i moraju se ukloniti s hranilišta. U mjere uzgoja u zimskom razdoblju moramo svrstati i interventni izlov iz sanitarnih i selektivnih razloga te redovni odstrjel prekobrojnih predatora, starih i trofejno dozrelih jedinki ostalih vrsta divljači u razini godišnjeg plana korištenja lovišta, kako bi, za sljedeću reproduktivnu sezonu, kod svih vrsta divljači ostala planovima predviđena brojnost zdravih i reproduktivno najkvalitetnijih jedinki i što povoljnija spolna i starosna struktura (kod krupne divljači). Na kraju, ne smijemo zaboraviti ni brigu o održavanju lovno-uzgojnih i lovno-tehničkih objekata, a posebno pristup (i ljudi i divljači) do hranilišta, pojilišta i skladišta hrane, kao i odgovarajući komfor za ugodan boravak u zatvorenim čekama i lovačkim kolibama lovaca koji se brinu o zaštiti lovišta i uzgoju divljači.





Elementi sigurnosti u lovu

Lov nosi sa sobom opasnosti od nesreća i nezgoda pa je potrebno težiti sigurnom lovu, koji se temelji na poštivanju pravila i propisa te pribraniosti i stalnoj koncentriranosti lovca na lov. Kad je lov siguran, doživljaj zadovoljstva lova i svega što lov pruža poput druženja, prijateljstva, relaksacije i uživanja u prirodi je potpun bez obzira na uspjeh lovnog dana. Opasnosti u lovu najčešće nastaju kao posljedica ljudske nepažnje, nepoštivanja i nepoznavanja uobičajenih pravila lova te nepravilnog rukovanja oružjem i municijom. Opasnosti od nepravilnog rukovanja i upotrebe oružja najčešće uzrokuje lovac uz ostale faktore: nedovoljna praktična educiranost; nepoštivanje sigurnosnih mjera i pravila lova; neodgovornost; neodržavanje oružja i municije na pravilan način; alkoholizirano stanje; bolesti. Nedovoljna praktična educiranost je problem bez obzira na obavezan položen lovački ispit jer mladi lovci iako sve teoretski znaju ovisni su o praksi i poduci iskusnih lovaca, dok problem prevelike sigurnosti u svoje znanje o lovu dovodi do nepoštivanja sigurnosnih mjera lova kod iskusnijih lovaca, jer koraci sigurnosno propisani za lov s vremenom njima postaju rutina te ih jednostavno nehotično zanemaruju. Također, jedan od razloga nepoštivanja sigurnosnih mjera kod lovaca je pohlepa i hvalisavost da baš on postigne najbolji odstrjel ili kod skupnog lova kad se lovac lovi preko prostora drugih lovaca u kontra smjeru lova. Isto tako pri upotrebi lovačkog oružja pojedinci ne vode brigu o smjeru pucanja pa ranjavaju kolegu lovca ili šetača misleći da je divljač. Neodgovornost u lovu je u biti nepoznavanje mjera sigurnosti i pravila lova te zanemarivanje

uputa lovnika čime neodgovorno dovodi u opasnost sebe i ostale lovce. Najčešći oblik neodgovornosti u lovu je neoprezni i brzopleti hitac koji završi u neželjenom smjeru koji tako ugrožava druge lovce. Neodržavanje oružja i municije, neadekvatno spremanje i rukovanje te oštećivanje smatra se jednom od opasnosti u lovu. Neodržavanjem oružja ono se oštećuje, najčešća oštećenja su zaglavljivanje naboja oružja i zatajenje udarne igle te kad lovac pokušava sam na svoj način otkloniti takvo oštećenje nastaje opasnost. Oružje se također oštećuje nepravilnim nošenjem, u takvim se slučajevima cijev puške puni blatom ili snijegom što može dovesti do prsnuća cijevi, a to je po život opasno za lovca. Opasnost u lovu i predstavlja nekorištenje adekvatne municije za punjenje oružja, što zna u cijevi oružja stvarati podpritiske koji također mogu dovesti do prsnuća cijevi. Također, među ove opasnosti spada i neadekvatno nošenje oružja, koje predstavlja veliku opasnost ukoliko se nosi vodoravno, a potrebno ga je nositi okomito na leđima da cijev „gleda“ u zrak. To oružje se treba prenositi u koferima ili navlakama te se držati u posebnoj zaključanom ormanu odvojenim od municije. U lovu je pravilo da je lov u alkoholiziranom stanju strogo zabranjen, ali upravo je to čest slučaj tokom lova, pogotovo zimi kad se pije „jedna za zagrijati“. Korištenje oružja u alkoholiziranom stanju je velika opasnost u lovu, jer je lovcu pod uticajem alkohola smanjena sposobnost rasuđivanja, reagiranja i kontrole, što dovodi do nesmotrenosti i nemogućnosti kontrole pri upotrebi oružja što može dovesti do pogubnih posljedica. Kod rukovanja oružjem



mnoge bolesti mogu dovesti lovca da u nekom trenutku može postati nesvjestan svojih postupaka pa je u nemogućnosti kontrolirati svoje radnje. Jedna od takvih bolesti je dijabetes te je potrebno da lovac koji je dijabetičar dobro brine o razini šećera u krvi kako ne bi pao u hipoglikemijski šok te time doveo u opasnost sebe i druge lovce. Također, prilikom rukovanja vatrenim oružjem potrebno je da su lovci u dobrom psihičkom stanju, jer primjerice rastresenost dovodi do nekontroliranih radnja i postupaka, što također može imati fatalne posljedice kao što je gubitak oružja, ne spremanje oružja i ostavljanje nadohvat djeci, ne pražnjenje oružja, itd

Najčešće opasnosti u pojedinačnom lovu su: penjanje i silaženje s napunjenom puškom, pad s čeke; prelaženje preko potoka i kanala s napunjenim oružjem, hodanje po klizavoj površini s napunjenim oružjem; stavljanje i vađenje napunjene puške u automobil; „igranje“ s oružjem dok je puška napunjena, a nezakočena. Kod pojedinačnog lova koji nije toliko zahtjevan za razliku od skupnog lova, sigurnosne mjere su odgovorno rukovanje oružjem te korištenje zaštitne opreme poput prsluka i odgovarajuće zaštitne obuće.

Skupni lov nosi višestruko više opasnosti od pojedinačnog lova te za ovakav način lova treba poznavati osnovna pravila. Prije početka lova na crnu, odnosno krupnu divljač i poslije završetka lova nije dopušteno pucanje, a puška se treba isprazniti i biti otvorena. Puška se puni tek na stajalištu, na čeki, kad počne lov. Svaki lovac treba biti upoznat sa položajem stajališta susjednih lovaca prije početka lova te sa smjerom kretanja pogoniča i smjerom vatrene linije. Zabranjeno je pucati u divlju svinju dok ne prođe vatrenu liniju. Zabranjeno je pucati u smjeru prigona. Lovac smije pucati tek kad je siguran da sa tim hitcem ne ugrožava sebe i druge lovce u lovu. Zabranjeno je napuštati svoje stajalište dok traje lov prigonom.

Kod lova na dlakavu sitnu divljač vrijede pravila kao kod skupnog lova na divlje svinje, dakle formacijom „vatrene linije“. Kod lova na pernatu sitnu divljač vrijede pravila za lov sitne divljači, odnosno odmaknuti od površine lova 10-15 metara te isto tako od susjednog lova. Pernata divljač se lovi u doletu te je osnovno pravilo: Ne pucati nisko! Pucati tek kad je divljač u naletu više od 30° u odnosu na površinu tla kako ne bi došlo do prosipanja sačme na ostale sudionike lova. Kod skupnog lova pogonom bitno je da se lovci drže linije lovaca kako ne bi došlo do opasnog nastanka „klina“ ili „džepa“. Ukoliko lovci ne poštuju pravila lova, lovnik prekida lov i ponovno vraća neodgovornog pojedinca u liniju lovaca. Potrebno je označiti pse reflektirajućim trakama, kako ne bi došlo do stradanja lovačkih pasa, koji se u skupnom lovu lako mogu zamijeniti za divljač.

Pravila za siguran lov treba poznavati i primjenjivati svaki lovac pri svakom lovu. Naravno uz to je potrebno da lovac u lovu koristi propisanu zaštitnu odjeću i obuću. Pravila za siguran lov su sljedeća: Lovac treba paziti na sebe i svojeg kolegu; s oružjem je potrebno rukovati odgovorno i na siguran način; potrebno je koristiti samo ispravno oružje i municiju; lovac kad ide u lov treba

biti fizički spreman i nerastresen; kad je lovac sam u lovu, nikad ne treba biti siguran da je sam; oružje uvijek osim kad strijelja treba držati u sigurnom smjeru; lovačka oprema treba služiti za siguran lov i pravilan odstrjel; treba poštovati upute lovnika i sigurnosne mjere u skupnom lovu; lovačko oružje i municiju potrebno je spremati na propisan način u zaključanom ormanu; oružje je potrebno nositi na propisani način (u koferu, futrolji, otvoreno, prelomljeno).



IN MEMORIAM



Selimović Huso
(1952.-2023.)

Prošlo je više od godinu dana od kako je redove LD „Spreča“ Kalesija, LS „Seljublje“ napustio naš Huso. Bio je aktivan lovac od 1979. godine. U svojoj dugogodišnjoj lovačkoj karijeri je dao nemjerljiv doprinos kalesijskom lovstvu za što je od Društva i Saveza dobio najveća lovačka priznanja i odlikovanja. Lovci Sekcije „Seljublje“ će ga pamtiti kao velikog prijatelja i lovca. Nek mu je rahmet.

LD „Spreča“ Kalesija



Tubić Rasim
(1952.-2024.)

Rasim je bio lovac LD „Spreča“ Kalesija od 1989. godine. Kao član Sekcije „Kalesija“ bio je posebno aktivan u uzgoju i zaštiti divljači, ali je bio angažovan i u drugim poslovima na unapređenju lovstva na području Kalesije. Za taj svoj doprinos od Društva je nagrađen lovačkom zahvalnicom i diplomom. Lovci Grupe „Prnjavor“ će ga pamtiti po blagoj naravi i odanom prijatelju. Nek mu je rahmet.

LD „Spreča“ Kalesija



Čorić (Osman) Hasan
(1955.-2024.)

Lovci LD „Srndač“ Gračanica, LS Piskavica, ostali su bez dobrog čovjeka i kolege, istinskog zaljubljenika prirode, koji je bio uzor i učitelj lovstva mnogima a prvenstveno mladim naraštajima. Smrt ga je zatekla u prirodi, na čeki. Tokom svog dugogodišnjeg lovačkog staža, Hasan je obavljao značajne dužnosti na nivou Sekcije i Društva, a za nesebično zalaganje dodjeljena mu je lovačka diploma Počasni lovac. Nek mu je rahmet.

LD „Srndač“ Gračanica

